

## CLXXIV.

*Lettre du Prince d'Orange au Magistrat d'Ypres. —  
Les Flamands ont déclaré la guerre aux Wallons. —  
Dispositions à prendre. (Arch. Y.)*

Edele Erentfeste eerbare voorsinighe bezondere goede vrienden, Wy verstaen dat de vier leden tslands van Vlaenderen orloghe vclaert hebben tegens den waelen binnen den zelven lande wesende waer omme alzoo de saecken soo verre zyn gecomen

1579  
18 Mai.

— 316 —

ende datter anders egeen middel en is omme de voors. landen van hare verdruckinghe te verlossen sal het sonderlinghe van noode wesen goede ordre te stellen dat het remedie ende medicque die men gebruyckt nyet erger en zy als de sieckte, gemerckt genoegh kennelyck is, dat in ghevalle het orloghe nyet en wordde gevuert sulcx als de saecke verheyst dat men zeekerlyck heeft te vreezen dat het lant van vlaendren zal bedorven ende gegeten worden van beyde zeyden dwelck het eenich middel zoude wesen omme tzelve lant geheelyck te ruineren. Ende voor zoo veele ons aengaet gemerckt wy alhier hebben in alle manieren ordre te stellen omme de stadt van Maestricht te ontzetten waerop dimportantie eenen yegelycken is kennelyck, comen wy ulieden wel verclaeren, dat alle de middelen die tot beschermenisse ende verlichtinghe van lande van vlaenderen zouden mogen geschickt wordden ul: gesonden zyn. Ende is ons leet dat men alhier nyet en mach gebruycken den heere de la Noue ende tvolck by hem wesende, Wy bemercken genoegh dat hy den wille zeer goet heeft, maer hy verthoont ons dickwils dat hy zonder grof geschut nyet goets en can uytrechten, het welck ongetwyffelt zulex is, ende en behoirt men egeenssints voor te nemen anders het orloghe te vueren dan in de vuegen als tzelve noodich is gemerckt anderssints tzelve nyet en zoude wesen dan het lant met incursien tegens malcanderen te bederven, dwelck is oirsaecke dat wy ulieden hier mede wel vrintlyck hebben willen bidden nyet te willen sparen van al tgene eenichssints in uwe macht soude mogen wesen, ende tzelve te werck te leggen te wylen de middelen ende occasie haer zyn presenteren alzoo wy wel zyn verzekert dat het geweld ende middelen die tegens het lant van vlaenderen wordden voorgewent, zeer swaer zyn ende grootelycx wordden geavanceert. Sulcx dat inegevalle ghylieden u voornemen ende het uytrechten van uwe saecken nyet en spoet ghylieden gedwongen zult worden in plaetse van uwen viant te bevechten zelve uwe beschermenisse te besorgen, het hoe langamer ende swaer wesen zal lichtelyck is te bemercken, biddende daer om anderwerven hier op sonderlinge te willen letten ende te nemen alzulcke resolutien als de saecke is verheysschende, oft anderssints zoudt veel beter wesen den anderen landen de presentie

van voors. heere de la Noue te gunnen (die dezelve grootelyck van doen hebben) dan hem aldaer zonder proffyt te houden, hier mede

Edele Eerntfeste eerzame voorsinnighe bezondere goede vrienden Onse heere godt zy met ulieden. Gescreven tot antwerpen den xviii dach Mey 1579.

De Prince van Orangien grave van Nassau  
lieutenant gñal van zyne hoocheyt.

« Ul zeer goede vrint tot uwen dienst »

GUILL DE NASSAU.

Den Edelen Eerentfesten eersamen voirsienighen en de discreten Voocht schepenen gesworen edelen ende notablen der stadt van Yperen onse besondere goede vrienden.

Re<sup>pta</sup> et lecta  $\bar{d}$  xx<sup>e</sup> mey 79.